

Kabanata 5

Pag-aaral ng Medisina sa Unibersidad ng Santo Tomas (1877-1882)

Sa kabutihang palad, kahit bigo at naging mapait ang unang pag-ibig ni Rizal, hindi naman ito nakaapekto sa kanyang pag-aaral sa Unibersidad ng Santo Tomas. Pagkaraan ng unang taon sa kursong Pilosopiya at Sulat (1877-78), lumipat siya sa kursong medisina. Kahit na nag-aaral ng medisina sa unibersidad na pinamamahalaan ng mga Dominiko, kalaban ng mga Heswita sa edukasyon, nanatiling tapat si Rizal sa Ateneo, kung saan marami siyang sinalihang gawain at nagpatuloy ng pag-aaral ng kurso sa pagsasarbey. Bilang isang Tomasino, nanalo siya ng maraming gantimpala sa literatura, nagkaroon ng ibang pag-ibig, at nakipaglaban sa mga estudyanteng Espanyol na mapang-insulto sa kakayahan ng mga estudyanteng Pilipino.

Ang Oposisyon ng Ina sa Mataas na Pinag-aralan. Pagkaraang magtapos sa Ateneo nang may pinakamataas na karangalan, nagtungo si Rizal sa Unibersidad ng Santo Tomas para magpatuloy ng pag-aaral. Noong Panahon ng Espanyol, ang Batsilyer sa Sining ay katumbas lamang ngayon ng mataas na paaralan at mga unang taon sa kolehiyo. Noon ito'y maaari lamang kuwalipikasyon ng isang nagtapos para makapasok sa isang

unibersidad. Kapwa nais nina Don Francisco at Paciano na makapakarera si Jose sa isang unibersidad. Ngunit si Doña Teodora, laging naaalala ang nangyari sa Gom-Bur-Za, ay tutol na tutol sa ganitong ideya, at sinabi niya sa kanyang asawa: "Huwag mo na siyang ipadala pa sa Maynila; marami na siyang alam. Kung mas marami pa ang kanyang malalaman, tiyak na mapupugutan na siya ng ulo."¹ Hindi kumibo si Don Francisco, ngunit pinakiusapan si Paciano na samahan ang nakababatang kapatid sa Maynila, sa kabila ng pagluha ng ina.

Maging si Rizal ay nagulat sa pagtutol ng kanyang ina dahil alam niya ang pagpapahalaga nito sa edukasyon. Pagkaraan ng ilang taon, isinulat niya sa kanyang dyornal: "Kinutuban na kaya noon ang aking ina sa kahihinatnan ko? Lagi nga kayang batid ng ina ang mangyayari sa anak?"

Pumasok si Rizal sa Unibersidad. Noong Abril 1877, si Rizal na noo'y maglalabing-anim na taong gulang, ay nagmatrikula sa Unibersidad ng Santo Tomas para sa kursong Pilosopiya at Sulat. Sa kursong ito siya nag-enrol dahil (1) ito ang gusto ng kanyang ama, at (2) "hindi pa ako sigurado sa magiging karera ko." Sumulat siya at humingi ng payo tungkol dito kay Padre Pablo Ramon, Rektor ng Ateneo na naging mabuti sa kanya noong estudyante siya ng kolehiyong iyon. Nang panahong iyon, nasa Mindanao ang Padre Rektor kaya hindi siya napayuhan kaagad. Kaya noong unang taon sa Unibersidad ng Santo Tomas (1877-1878), nag-aral si Rizal ng Kosmolohiya, Metapisika, Teodisiya, at Kasaysayan ng Pilosopiya.

Nang sumunod na taon (1878-79), natanggap ni Rizal ang payo ng Rektor ng Ateneo na nagmumungkahing medisina ang mainam na kurso para sa kanya. Kaya noon di'y nag-enrol siya sa mga kursong paghahanda para sa medisina. Gusto ni Rizal na kumuha ng medisina dahil ninanais niyang magamot ang pagkabulag ng kanyang ina.

Tinapos ang Kurso ng Pagsasarbey sa Ateneo (1878). Noong unang taon sa Unibersidad ng Santo Tomas (1877-78), nag-aral din si Rizal sa Ateneo. Kumuha siya ng kursong bokasyonal na nagbigay sa kanya ng titulong *perito agrimensor* (dalubhasang agrimensor). Nang panahong iyon, ang mga kolehiyong panlalaki sa Maynila ay may mga kursong bokasyonal sa agrikultura, komersiyo, mekaniko, at pagsasarbey.

Gaya ng inaasahan, nanguna si Rizal sa lahat ng asignatura ng pagsasarbey, at nagkamit siya ng mga gintong medalya sa agrikultura at topograpiya. Sa edad na 17, naipasa niya ang eksamen sa kursong pagsasarbey, ngunit hindi kaagad naigawad sa kanya ang titulong agrimensor dahil wala pa siya sa edad. Naibigay lamang ang titulong ito noong Nobyembre 25, 1881.

Bagaman Tomasino, madalas pa ring dinadalaw ni Rizal ang Ateneo. Hindi lamang dahil ito sa kursong pagsasarbey, kundi dahil sa kanyang katapatan sa Ateneo, kung saan marami siyang magagandang alaala, at kung saan ang mga Heswitang propesor, di tulad ng mga Dominiko ay nagmamahal sa kanya at nagbibigay ng inspirasyon sa kanya para mapagbuti niyang lalo ang kanyang pag-aaral. Patuloy siyang naging aktibo sa mga gawain sa Ateneo. Naging pangulo siya ng Akademya ng Literaturang Espanyol at kalihim ng Akademya ng mga Likas na Agham. Ipinagpatuloy pa rin niya ang pagiging miyembro ng Kongregasyon ni Maria, at kung saan siya nag kalihim.

Mga Pag-ibig ni Rizal. Masipag sa pag-aaral niya sa Unibersidad ng Santo Tomas at marami pang gawain sa Ateneo, ngunit may panahon pa rin si Rizal para sa pag-ibig. Isa siyang pangaraping romantiko na gusto ring "makatikim ng pag-ibig." Ang malungkot niyang karanasan sa unang pag-ibig ay nakatulong para matutunan niyang maging mas matalino sa larangan ng pag-ibig.

Pagkaraang mawala sa kanya si Segunda Katigbak, niligawan niya ang isang dalagang taga-Calamba. Sa kanyang talaarawan, tinawag niya itong "Binibining L," at inilarawan niyang "maganda

at may kahali-halinang mga mata."² Ilang beses din niyang dinalaw ang dalaga sa tahanan nito, ngunit biglang inihinto ang kanyang panliligaw, at tuluyan nang namatay ang pag-iibigan. Walang nakaaalam kung sino ang dalagang ito. Hindi sinabi ni Rizal ang kanyang ngalan kaya hindi na nalaman ng kasaysayan kung sino ang dalagang ito. Gayunman, sinabi ni Rizal ang dalawang dahilan bakit nagbago ang isip niya: (1) iniibig pa rin niya si Segunda, at (2) hindi gusto ng kanyang ama ang pamilya ni "Binibining L."

Pagkaraan ng ilang buwan, noong ikalawang taon niya sa Unibersidad ng Santo Tomas, nangupahan si Rizal sa bahay ni Doña Concha Leyba sa Intramuros. Ang kapitbahay ni Doña Concha ay sina Kapitan Juan at Kapitana Sanday Valenzuela ng Pansanjan, Laguna, na may magandang anak na babae, si Leonor. Laging bukas ang tahanan ng mga Valenzuela kay Rizal, na isang estudyante ng medisina mula Calamba, dahil sa husay nito sa salamangka. Niligawan niya si Leonor Valenzuela, na isang matangkad na babaing maganda ang tindig.³ Pinadadalhan niya ito ng liham ng pag-ibig na nakasulat sa tintang di-nakikita. Ang tinta ay gawa sa ordinaryong asin at tubig. Hindi ito nakikita sa papel. Si Rizal, na mahusay sa kimika, ang nagturo kay Orang (palayaw ni Leonor Valenzuela) ng lihim sa pagbasa ng anumang talang nakasulat sa tintang di-nakikita. Pinapainit ito sa ibabaw ng kandila o lampara upang lumitaw ang mga salita. Ngunit, tulad ng kay Segunda, tumigil siya sa panliligaw kay Orang.

Ang sumunod na pag-ibig ni Rizal ay sa isa pang Leonor—Leonor Rivera na pinsan niyang taga-Camiling. Noong 1879, noong simula ng ikatlo niyang taon sa Unibersidad tumira siya sa Casa Tomasina sa Blg. 6 Kalye Santo Tomas, Intramuros. Ang may-ari ng bahay at tiyuhin niyang si Antonio Rivera ay may magandang anak na babae, si Leonor, na estudyante sa Kolehiyo ng La Concordia, kung saan nag-aaral din si Soledad (bunsong kapatid na babae ni Rizal). Si Leonor ay tubong-Camiling, Tarlac at isinilang noong Abril 11, 1867. Maganda siya, "mayumi gaya ng namumukadkad na bulaklak, na may mabubuting mata." Nabuo ang isang pag-ibig kina Jose at Leonor. Nagkasundo sila. Sa

kanyang mga liham kay Rizal, "Taimis" ang inilalagandang ngalan ni Leonor nang sa gayon ay maitago nila ang kanilang relasyon sa mga magulang at kaibigan.

Biktima ng Kalupitan ng Opisyal na Espanyol. Nang si Rizal ay nasa unang taon sa medisina sa Unibersidad ng Santo Tomas, naranasan niya ang kalupitan ng mga Espanyol. Isang madilim na gabi sa Calamba, noong 1878, naglalakad siya sa kalsada. Hindi niya napansin ang isang lalaki ng nadaanan niya. Dahil hindi niya kilala ang anino, hindi niya nasaluduhan ni nabati ito ng "Magandang Gabi." Ang lalaki sa dilim ay isa palang tenyente ng Guardias Civiles. Nagalit ito at hinarap si Rizal, hinampas ng kanyang espada at sinaktan ang likuran.

Hindi naman malubha ang naging sugat ni Rizal ngunit naging masakit ito sa kanya. Isinumbong ni Rizal ang insidente kay Heneral Primo de Rivera, ang Espanyol na gobernador-heneral ng Pilipinas ng panahong iyon. Ngunit walang nangyari sa kanyang reklamo dahil siya ay isang indio at Espanyol ang mapang-abusong tenyente. Kinalaunan, sa isang liham kay Blumentritt, isinulat noong Marso 21, 1887, sinabi niyang "nagpunta siya sa Kapitan-Heneral ngunit wala siyang natamong katarungan; gumaling ang aking sugat sa loob ng dalawang linggo." ⁴

"Para sa Kabataang Pilipino" (1879). Noong 1879, nagkaroon ng paligsahan sa panitikan ang Liceo Artistico-Literario ng Maynila, isang samahan ng mga mahilig sa sining at panitikan. Naglaan ito ng gantimpala para sa pinakamagandang tulang isinulat ng isang katutubo o mestiso. Si Rizal, na noo'y 18 taong gulang, ay nagsumite ng kanyang tulang pinamagatang "*A La Juventud Filipina*" (Para sa Kabataang Pilipino).

Ang Inampalan, na binubuo ng mga Espanyol, ay humanga sa tula ni Rizal at iginawad dito ang unang gantimpala na isang pilak na panulat, hugis-pakpak at may dekorasyon na gintong laso. Masayang-masaya ang batang si Rizal sa pagkapanalo niya sa timpalak ng pagsulat ng tula. Taos sa puso siyang binati ng mga

dati niyang propesor sa Ateneo, mga kaibigan at kamag-anak. Ang nagwaging tula, ang "*A La Juventud Filipina*" (Para sa Kabataang Pilipino) ay tulang nagbibigay ng inspirasyon. Sa pamamagitan ng magagandang berso, hiniling ni Rizal sa kabataang Pilipino na imulat na ang mga mata sa mga nangyayari sa kanilang paligid, na hayaang pumailanlang ang kanilang talino sa sining at agham, at lagutin ang tanikalang pumipigil sa diwa nila bilang tao. Ito ang tula: ⁵

Para sa Kabataang Pilipino

Tema: "Lumago ka, Kiming Bulaklak"

Taas-noong tumindig ka,
O Kabataan, saanman naroon,
Hayaan ang liwanag
Ng magandang bikas ay makita,
Ikaw na pag-asa ng bayan!

Halina, ikaw na tunay na henyo,
At bigyan ng inspirasyon:
Sa tulong ng mapagpalang kamay,
Magsahangin ka nga't ilipad
Ang aming isipan nang magkataas-taas.

Bumaba kang kasama ang liwanag
Ng sining at agham, dunong na tunay,
O Kabataan, kilos at kalagin
Ang tanikalang gumagapos
Sa iyong diwa at kaluluwa.

Masdan ang lumiliyab na putong
Sa gitna ng mga aninong naglipana,
Mapagpalang kamay ng Inang Bayan
Putong niya'y marikit na korona
Dakilang alay niya sa lupaing ito.

Panahon na upang ika'y magbangon
Iyong bagwis na pagal na pagal
Sa paghahanap ng langit ng Olympia
Mga awiting pagkatamis-tamis,
Mas malamyos pa sa patak ng ulan.

Ikaw, na ang dakilang tinig
Ang mas mairog kaysa Pilomel,
Sa gabing tahimik, mahungkot
Ikaw ang siyang tanging lunas
Ng mga kahuluwang nagdudusa.

Ikaw, na ang diwa ay matalas
Ginigising, binubuhay, aking isipan;
At ang alaalang nagpapalinaw
Sa iyong henyong ilaw
Tunay na lakas ng isang imortal.

At ikaw, ang diwang malinaw
Na mahal nina Pebo at Apollo;
Ang kanilang kayang mahiwagang kamay
Ang siyang kumakalinga, umaayos
Sa kalikasan na nasa 'yong kanbas?

Humayo ka't pagliyabin ang apoy
Ng iyong henyo nang mangarap ng lawrel;
Kailangang maipamamahagi ang apoy,
Nang makamit yaring tagumpay,
Para sa mas nakararami sa ating lahi.

Araw, O masayang araw,
Mahal kong Pilipinas, aking bayan!
Basbasan mo kami't alagaan
Ngayon at magpakailanman,
Tungo sa maunlad na kinabukasan.

Ang nagwaging tulang ito ni Rizal ay isang klasiko sa panitikang Filipino. Una, isa itong napakagandang tula sa Espanyol na isinulat ng isang Pilipino, na kinilala ng mga Espanyol na awtoridad sa panitikan, at pangalawa, ipinahahayag ng tula sa kauna-unahang pagkakataon ng isang Pilipino—hindi mga dayuhan— ang konsepto ng pagiging makabayan, na ang kabataan ang siyang "pag-asa ng bayan."

"Ang Konseho ng mga Diyos" (1880). Nang sumunod na taon (1881), nagkaroon muli ng panibagong paligsahan sa panitikan ang Liceo Artistico-Literario para sa ikaapat na sentenaryo ng kamatayan ni Cervantes, dakilang Espanyol na manunulat at awtor

ng *Don Quixote*. Sa pagkakataong ito, ang paligsahan ay bukas sa kapwa Pilipino at Espanyol.

Maraming manunulat sa timpalak—mga pari, mamamahayag, iskolar, at propesor. Si Rizal, na inspirasyon ay ang pagwawagi noong nakaraang taon, ay sumali sa timpalak. Isinumite niya ang isang dulang alegorikal na pinamagatang *El Consejo de los Dioses* (Ang Konseho ng mga Diyos).⁶

Ang Inampalan ng paligsahan ay mga Espanyol. Pagkaraan ng masusing deliberasyon sa mga lahok, iginawad nila ang unang gantimpala sa trabaho ni Rizal dahil pinakamahusay ang pagkakasulat nito sa lahat ng mga lahok.⁷ Ang Espanyol na komunidad sa Maynila, sa pangunguna ng pahayagang Espanyol, ay matigas na tumutol sa desisyong ito dahil ang nagwaging awtor ay isang indio. Sa kabila ng mga pagtutol, ang gantimpala ay ibinigay kay Rizal—isang gintong singsing na may nakaukit na mukha ni Cervantes. Isang Espanyol na manunulat, si D.N. del Puzo, ang nanalo ng pangalawang gantimpala. Sa kauna-unahang pagkakataon, isang indio—isang labinsiyam na taong gulang na estudyante ng medisina—ang nanguna sa isang pambansang paligsahan sa panitikan, at tinalo ang maraming manunulat na Espanyol nang panahong iyon.⁸ Masayang-masaya si Rizal dahil napatunayan niyang di totoong mga Espanyol lamang ang nakahihigit sa anumang larangan dahil kung mabibigyan ng pagkakataon ang mga katutubo ay maipakikita nilang maaari silang itapat sa anumang lahi.

Ang nagwaging alegorya ni Rizal ay isang obra maestrang batay sa mga klasikong Griyego. Sa pagsulat nito, si Rizal, bagaman estudyante ng Unibersidad ng Santo Tomas, ay tinulungan ng mabait na Padre Rektor ng Ateneo sa pangangalap ng kinakailangang materyales. Nagtatag ang alegorya ng pagkakatulad nina Homer, Virgil, at Cervantes. Tinalakay ng mga diyos ang mga merito ng mga dakilang manunulat na ito, at nagpasyang igawad ang trumpeta kay Homer, ang lira kay Virgil, at lawrel kay Cervantes. Ang alegorya ay masayang nagtapos sa pagsasaya

ng mga ada, diwata, at iba pang tauhang mitolohikal.

Iba pang Pampanitikang Gawain. Bukod sa dalawang nagwaging trabaho, si Rizal, bagaman nag-aaral ng medisina, ay nakalikha pa rin ng mga tula at isang sarsuwela. Ang sarsuwelang ito ay *Junto al Pasig* (Sa Tabi ng Pasig) na itinanghal ng mga Atenista noong Disyembre 8, 1880, pista ng Immaculada Concepcion, ang Patron ng Ateneo. Isinulat niya ito nang siya ay Pangulo ng Akademya ng Literaturang Espanyol sa Ateneo.

Kung pagbabatayan ang gandang pampanitikan, hindi naman ganoon katampok ang *Junto al Pasig*. Ngunit may mga bahagi rito na nagpapahayag ng satirika ng mga makabayang ideya ng awtor. Halimbawa, pinasalita ni Rizal si Satanas nang ganito hinggil sa Pilipinas—

*"Ngayo'y walang ginhawa,
Malungkot na umuungol sa kapangyarihan ng mga dayuhan,
At dahan-dahang namamatay,
Sa walang kabanalang kapit ng Espanya."*

Nang taong iyon (1880), sumulat siya ng isang sonatang pinamagatang *A Filipinas* para sa album ng Samahan ng mga Iskultor. Sa sonatang ito, hinikayat niya ang mga artistang Pilipino na magbigay-dangal sa Pilipinas.

Noong nakaraang taon, noong 1879, nilikha niya ang tulang *Abd-el-Azis y Mahoma*, na binigkas ng isang Atenista, si Manuel Fernandez, noong gabi ng Disyembre 8, 1879 bilang parangal sa Patron ng Ateneo.

Kinalaunan, noong 1881, isinulat niya ang *Al M.R.P. Pablo Ramon*, isang tulang nagpapakita ng pagmamahal kay Padre Pablo Ramon, ang rektor ng Ateneo, na naging mabuti at matulungin sa kanya.

Pagbisita ni Rizal sa Pakil at Pagsanjan. Noong Mayo 1881, nang siya ay estudyante ng medisina sa Unibersidad ng Santo

Tomas, sumama si Rizal sa peregrinasyon sa bayan ng Pakil, kilalang dambana ng Birhen Maria delos Dolores.⁹ Kasama niya ang mga kapatid na sina Saturnina, Maria, Trinidad, at kanilang mga kaibigang babae. Sumakay siya sa kasko mula Calamba papuntang Pakil, Laguna, at tumuloy sila sa bahay nina G. at Gng. Manuel Regalado, na ang anak na si Nicolas ay kaibigan ni Rizal sa Maynila.

Nabighani si Rizal at kanyang mga kasama sa tinatawag na turumba, kung saan ang mga tao ay nagsasayaw sa kalsada habang ipinuprusisyon ang istatwa ng milagrosang Birhen Maria de los Dolores. Habang nagsasayaw sila ay umaawit sila:

*Turumba, Turumba, Mariangga
Matuwa tayo't masaya
Sumayaw ng turumba
Puri sa Birhen Maria*

Sa Pakil, nabighani si Rizal sa isang magandang kolehiyalang si Vicenta Ybardolaza, na mahusay tumugtog ng alpa sa tahanan ng mga Regalado. Mula Pakil, nagdaan si Rizal at mga kasama sa kalapit-bayan ng Pagsanjan. Dalawa ang dahilan nito: ito ang bayang sinilangan ni Leonor Valenzuela, isa sa mga naging kasintahan ni Rizal sa Maynila, at makita ang Talon ng Pagsanjan na kilala sa buong mundo.

Pagkaraan ng ilang taon, binanggit ni Rizal ang turumba sa Kabanata VI ng *Noli Me Tangere* at Talon ng Pagsanjan sa kanyang talaarawan niya (Estados Unidos—Sabado, Mayo 12, 1888), kung saan sinabi niya napakaganda nga ng Talon ng Niagara ngunit "hindi kasingganda ng Talon ng Los Banos, (sic) Pagsanjan."

Kampeon ng mga Estudyanteng Pilipino. Si Rizal ang kampeon ng mga estudyanteng Pilipino na madalas na napapaaway sa mayayabang na estudyanteng Espanyol. Hindi matanggap ng mga ito na nahihigitan sila ng Pilipino, kapag iniinsulto nila ay tinatawag na "*Indio, chongo!*" Bilang ganti, tinatawag naman sila ng mga Pilipino na "*Kastila, bangus!*" Madalas na nauuwi ito sa

pag-aaway sa lansangan.

Nakakasama rin si Rizal sa mga pag-aaway na ito. Dahil nagsanay siya sa pag-eeskrima at *wrestling*, at talaga namang matapang, nakilala siya sa mga away na ito. Noong 1880, itinatag niya ang lihim na samahan ng mga estudyanteng Pilipino sa Unibersidad ng Santo Tomas at tinawag itong Compañerismo (Pagsasamahan), at ang mga kasapi ay tinawag na "Kasama ni Jehu," sunod sa ngalan ng isang heneral na Ebreo na nakipaglaban sa mga Arminiano at namuno sa Kaharian ng Israel sa loob ng 28 taon (843-816 B.C.). Siya ang pinuno ng lihim na samahan, at kasama niya ang kanyang pinsang taga-Batangas na si Galicano Apacible na siya namang kalihim. Pinamunuan ni Rizal ang pakikipaglaban sa mga estudyanteng Espanyol.

Sa isang labanan ng mga estudyanteng Pilipino at Espanyol sa may Escolta sa Maynila, nasugatan sa ulo si Rizal. Duguan at nababalutan ng alikabok, dinala siya ng mga kaibigan sa kanyang inuupahang bahay, sa Casa Tomasina. Masuyong nilinis at ginamot ni Leonor Rivera ang kanyang sugat.

Malulungkot na araw sa UST. Si Rizal, na mahusay na mag-aaral ng Ateneo, ay hindi naibigan ang atmospera ng edukasyon sa Unibersidad ng Santo Tomas. Hindi siya masaya sa institusyong Dominiko. dahil (1) hindi maganda ang pagtingin sa kanya ng mga Dominikong propesor, (2) mababa ang pagtingin sa mga estudyanteng Pilipino, at (3) sinauna at mapang-api ang sistema ng pagtuturo.

Sa kanyang nobelang *El Filibusterismo*, inilarawan niya kung paano hiyain at insultuhin ng mga Dominikong propesor ang mga estudyanteng Pilipino. Ipinakita rin niya ang sinaunang sistemang pagtuturo rito, lalo na sa larangan ng pagtuturo ng mga likas na agham. Ikinuwento niya sa Kabanata XIII, "Ang Klase sa Pisika," na ang asignaturang agham ay itinuro nang walang ginagawang eksperimento sa laboratoryo. Ang mikroskopyo at iba pang aparato sa laboratoryo ay nakatago lamang sa eskaparate

para makita ng mga panauhin, ngunit di para gamitin ni hawakan ng mga estudyante.

Dahil sa ganitong ugali ng kanyang mga propesor, si Rizal, ang pinakamahusay na estudyante ng Ateneo, ay hindi nagkamit ng mataas na karangalan. Bagaman ang mga grado niya noong unang taon niya sa kursong pilosopiya ay "pinakamahusay," hindi kahanga-hanga ang mga nakuha niya sa apat na taon niya sa kursong medisina. Ito ang rekord ng kanyang pag-aaral sa Unibersidad ng Santo Tomas (1877-82):¹⁰

1877-1878

Kosmolohiya at Metapiska	Pinakamahusay
Teodisiya	Pinakamahusay
Kasaysayan ng Pilosopiya	Pinakamahusay

1878-1879 (Medisina) - Unang Taon

Pisika	Mainam
Kimika	Pinakamahusay
Likas na Kasaysayan	Mahusay
Anatomiya 1	Mahusay
Disekyon 1	Mahusay

1879-1880 (Medisina) - Ikalawang Taon

Anatomiya 2	Mahusay
Disekyon 2	Mahusay
Pisiolohiya	Mahusay
Pribadong Kalusugan	Mahusay
Pampublikong Kalusugan	Mahusay

1880-1881 (Medisina) - Ikatlong Taon

Panlahatang Patolohiya	Mainam
Terapyutiks	Pinakamahusay
Siruhiya	Mahusay

1881-1882 (Medisina) - Ikaapat na Taon

Medikal na Patolohiya	Mahusay na mahusay
-----------------------------	--------------------

Pansiruhayang Patolohiya	Mahusay na mahusay
Obstetrika	Mahusay na mahusay

Desisyong Makapag-aral sa Ibang Bansa. Pagkaraang matapos ang ikaapat na taon sa kursong medisina, nagpasya si Rizal na mag-aral sa Espanya. Hindi na niya makayanan ang malawakang panlalait, deskriminasyon, at pagkapoot sa Unibersidad ng Santo Tomas. Kaagad namang sinang-ayunan ng kanyang nakatatandang kapatid na lalaki ang kanyang desisyong magpunta sa Espanya, gayundin ang dalawang kapatid na babae, sina Saturnina (neneng) at Lucia, Tiyo Antonio Rivera, ang mag-anak na Valenzuela, at ilang kaibigan.

Sa kauna-unahang pagkakataon, hindi humingi si Rizal ng permiso at pagbasbas mula sa mga magulang dahil alam niyang salungat sila, lalo na ang kanyang ina, sa desisyong makapangibang-bayan. Hindi rin niya sinabihan maging ang kanyang mahal na si Leonor. Alam niyang si Leonor, dahil babae, bata, at romantika, ay hindi makapagtatago ng isang lihim. Kaya ang mga magulang ni Rizal, si Leonor, at mga awtoridad na Espanyol ay walang kaalam-alam sa kanyang pasyang mangibang-bayan para magpatuloy ng kanyang pag-aaral sa medisina sa Espanya, kung saan ang mga propesor doon ay mas liberal kaysa sa mga Unibersidad ng Santo Tomas.

* * * * *